



Loke nos pueblo kier o mester sa

Pa: Lord Cobashi

Prome cu tur cos, mi kier gradici Sr. Jossy Mansur, y e Directora, pa e espacio den Diario, cual ta un di e corant mas lesa y cual tin mas libertad di palabra aki na nos Dushi Aruba.

1) Mi pueblo stima, mi kier pa boso lesa esaki masha atento. Boso por corda y por mira e Proyecto di Casnan Prefabrica na Noord, algun aña pasa, cual a termina basta aña pasa. Tambe boso por corda e Proyecto di Cas na Tarabana y Madiki. cual tambe a termina. E Proyecto di Cas di Village, tambe a cuminsa, pero lamentablemente, diripiente esey a tranca. Mi a skirbi varios biaha pidiendo pa caba e proyecto ey, y te ainda nada a wordo haci, aunke nos tin dos representante den Gobierno, un potente orador den Staten y un Ministro di Turismo. Pa colmo nan ta biba na San Nicolas tambe.

2) Segun e papia, aki na Aruba no tin discriminacion, pero mi no sa con lo bay yama esaki. Den La Prensa di Dialuna 16 di Mei 1990, a sali na grandi, cu FCCA, na cabes, cu e Project Buro, definitivamente ta keda elimina. Por fabor busca e La Prensa ey y les'e pa bo convence bo mes. Project Buro, kier men e oficina cu ta encarga cu renovacion di e Village, lo muda pa Tarabana, banda di e edificio di FCCA. Mi pueblo, boso ta kere cu esey ta husto? Tur otro proyectonan a termina, pero esun di Village no, PAKICO?

Nos patria stima, Hulanda, cual nunca nos mester lubida, a duna un gran donacion di placa pa caba cu e Projecto di Village, kico a para cu n'e anto? Mi ta puntra mi mes si e Projecto di Village por caba ta pasobra e Village ta e bario di seccion unda e mayoria di hende preto ta biba? Of pa via di discriminacion? Oranjestad ta nos Capital, e mester buildup y mester ta bunita, pero corda cu San Nicolas tambe ta un ciudad importante, y tambe mester buildup.

Awor cu Coastal y Wickland Oil pronto lo ta den full operacion, San Nicolas su nomber lo ta hopi mas popular turisticamente y mundialmente. Corda bon, San Nicolas tambe ta un parti di nos dushi Aruba te ainda. Boso sa cu e Director di FCCA ta un Arubiano bibando na San Nicolas? Figurabo, un homber manera Louis Brown, un di e motornan tras di e Projecto di Village y mayoria di su trahadornan ta wordo traslada na Playa fin di e luna aki of otro luna?

Ta parce cu Village ta bon solamente tempo di campaña of eleccion. Tempo di eleccion bo ta mira tur e grandinan na tur skina di e mesun Village, unda e hende preto ta biba, buscando voto.

3) Mi tin un sobrino, cu ta Arubiano studiando na Hulanda. Aña pasa el a bin pa waak nos dushi Carnaval. Su galifa, un

muchamuhur hulandes, tambe a bin, pero via San Juan, Puerto Rico. Segun e muchamuhur, el a conversa cu algun muchamuhur mericano. Nan a puntr'e unda e ta bay. El a contestanan, Aruba, nan a bis'e cu nan a lesa den un brochure mericano, cu e Village na San Nicolas ta e GHETTO, no bishit'e. GHETTO kier men e parti sushi di e isla. Bo ta kere cu e remarke et ta dushi pa bo tende di nos dushi Aruba? Segun mi esey ta un berguenza. Pa e motibo ey tur ora bay mi ta skirbi y pidi manera un mucha chikito na rudia pa caba cu e proyecto di Village, y awor enbez di cab'e, nos a haya un bunita regalo, nan ta mud'e pa Tarabana.

Mi ta spera cu Domeinbeheer of Serlimar por zorg pa tumba e cas No. 217 na Bernhardstraat y e otro porkerianan cual ta totalmente contra e salud di hende. Pa San Nicolas progresa, tur e porkerianan ey mester wordo tumba y desparce.

E CUENTA DI PARIBA DI BRUG Y PABAO DI BRUG, pa mi ta sona asina estúpido, pasobra con cu sea toch ta Aruba. Mi no sa pakico nan kier dividi nos dushi Aruba? Wel como nan ta papia di pabao di brug y pariba di brug, nos tin 3 Minister PARIBA DI BRUG, E VICE PRESIDENTE DI STATEN, E GRAN ORADOR DI STATEN, den nos gobierno y "last but not least" E DIRECTOR DI FCCA.

Mi ta kere cu nan lo mester ta orguyoso pa drecha San Nicolas. Diadomingo na RADIO ANTILLIANA, nos a scucha nos gran representante di Staten di San Nicolas, SR. BENNY NISBET, papiando di renobacion di PROMENADE Y DI NOS SHOPPING CENTER NA ZEPPENFLEDTSTRAAT, Y E CARIBBEAN PLAZA, cu lo bin dilanti e Postkantoor di San Nicolas. Tur e cosnan ey ta sona bunita, y nos lo ta contento pa miranan bira realidad, pero nos ta mas tanto interesa pa e mira e Village Project bin cla.

Figurabo si tur e proyectonan e bin cla, y un o algun turista dicidi pa dal un keiro door di tur e cayanen den Village, y waak poco di e porkerianan ey den; mi kier men e casnan deplorable, con nos pueblo o nos gobierno lo sinti?

Durante e persconferentie di e Ministerraad cu Minister Hirsch Ballin, nos Prome Minister a bisa cu pronto lo bin 38 cas na San Nicolas. Nos kier gradici nos Prome Ministro for di awor y nos kier pa e sa cu nos tin confianza den dje.

Masha, masha danki y te un otro oportunidad. Corda bon cu tur Diadomingo mi tin un programa na Radio Caruso Booi FM Stereo, for di merdia 12'or te 1'or. E programa yama "Lord Cobashi cu Critica Constructivo, Loke Nos Pueblo Kier of Mester Sa."